



JABATAN WILAYAH PERSEKUTUAN

Blok 2, Menara Seri Wilayah, Presint 2, 62100 Putrajaya

Tel: 03-8000 8000 Faks: 03-8889 7957

Laman web: www.jwp.gov.my

KENYATAAN MEDIA

700 ASNAF DI WP PUTRAJAYA MENERIMA SUMBANGAN NUR RAMADAN WILAYAH PERSEKUTUAN

PUTRAJAYA, 15 MAC 2024 – Jabatan Wilayah Persekutuan dengan kerjasama Perbadanan Putrajaya menganjurkan Program Nur Ramadan Peringkat Wilayah Persekutuan Putrajaya 2024/1445H bagi mengimarahkan bulan Ramadan. Program Nur Ramadan Wilayah Persekutuan merupakan program tahunan Jabatan Wilayah Persekutuan dalam menyantuni golongan yang memerlukan terutamanya orang kelainan upaya (OKU), warga emas, ibu tunggal dan anak-anak yatim. Jumlah keseluruhan peruntukan bagi sumbangan program Nur Ramadan Wilayah Persekutuan tahun ini adalah sebanyak RM1,100,000.00 yang merupakan sumbangan wang zakat daripada Majlis Agama Islam Wilayah Persekutuan. Disamping itu, Jabatan Wilayah Persekutuan turut menyumbangkan RM100,000.00 kepada setiap Wilayah Persekutuan bagi penyediaan juadah berbuka puasa dan moreh kepada para asnaf.

Hari ini seramai 700 orang penerima sumbangan di Wilayah Persekutuan Putrajaya termasuk mereka yang tidak berkemampuan menerima sumbangan wang tunai RM200.00 setiap seorang. Keseluruhan peruntukan sumbangan Nur Ramadan di WP Putrajaya adalah sebanyak RM140,000.00. PPj juga turut menyediakan pek asas bakul makanan bernilai RM50.00 seperti beras, minyak, gula dan tepung kepada semua asnaf yang menerima sumbangan Nur Ramadan. Sumbangan kepada Masjid Tuanku Mizan Zainal Abidin turut disampaikan pada hari ini berjumlah RM4,000.00 bagi menambahkan peruntukan penyediaan makanan berbuka puasa jemaah masjid.

Melalui penganjuran program Nur Ramadan Wilayah Persekutuan ini, pihak kerajaan dapat menyantuni golongan miskin yang seterusnya dapat meringankan beban golongan ini. Selain itu, program ini juga turut menambahkan lagi nilai kasih sayang dalam kalangan warga Wilayah Persekutuan. Pemilihan penerima sumbangan di Wilayah Persekutuan Putrajaya ini dipilih melalui senarai asnaf yang berdaftar dengan MAIWP, sistem eKasih dan Jabatan Kebajikan Masyarakat mengikut kategori asnaf yang ditetapkan termasuk fakir, miskin, al-gharimin, al-riqab, fisabillah dan muallaf. Perbadanan Putrajaya juga sentiasa komited dalam membantu para asnaf di Wilayah Persekutuan Putrajaya dengan menyalurkan pelbagai bantuan lain dari semasa ke semasa, antaranya adalah Sentuhan Kasih Wilayah Persekutuan sempena Hari Wilayah Persekutuan 2024, Bantuan *Back to School* dan Bantuan Kasih Aidilfitri.

Semoga penyampaian sumbangan Nur Ramadan Wilayah Persekutuan ini sedikit sebanyak dapat menyinari kehidupan penerima di samping mengeratkan ukhuwah, perasaan kasih sayang dan persaudaraan dalam menyatupadukan rakyat untuk hidup dalam kemajmukan MADANI yang mengangkat nilai kesederhanaan dan kemanusiaan dengan menyemarakkan amal jariah kepada golongan yang kurang berkemampuan.

**Disediakan oleh:
Bahagian Komunikasi Korporat
Jabatan Wilayah Persekutuan
15 Mac 2024**